

## LITURGI MINGGU EPIPHANIAS II

GBKP RG.CIJANTUNG

Warna Stola: Mbentar

Minggu, 16 Januari 2021

*Secara Live Streaming Melalui Youtube GBKP Cijantung Ras Onsite*

=====

### A. PERSIKAPEN

----- Nikapken pusuh ras ukur guna ngadap man Tuhan alu ertoto -----

### B. KEBAKTIN

#### 1. RENDE : KEE No.53 : 1,4

(Pemandu Lagu, ndilo perpulungen rende  
guna ersikap bengket ku kebaktin)

----- POSISI PEMANDU LAGU PENGALA KU PERPULUNGEN -----

Mejuah-juah, selamat wari Minggu man banta kerina ngawan ni perpulungen  
GBKP Runggun Cijantung ras man banta kerina ija pa pe ringan si mengikuti kebaktin  
enda, arah kanal *youtube* GBKP Runggun Cijantung. Sikataken bujur man Dibata si tetap  
ngarak-ngarak kegeluhenta ras tetap setia ngkelengi kita. Mari sisikapkan pusuh,  
perukuren ras dirinta erkebaktin man Dibata. Dibatalah si erkuasa ras termulia i bas  
kebaktin enda, benana nari seh ku pendungina. Mari sipuji Tuhan alu rende kita:

KEE No.53 : 1,4

**“PESIKAP KAM K’RAJANGNDU E“**

1. Pesikap kam k’rajangndu e, ban Tuhan Yesus reh  
Melikas min ukurndu e, ban Tuhan Yesus reh  
Pesikap k’rajangu kin, O, Tuhan lah kita jumpa min
4. Ukurku, peratenku pe, pemobar Tuhan min  
Pehuli lagu langkah e, lah jumpa ras pagin  
Pesikap k’rajangu kin, O, Tuhan lah kita jumpa kin

#### 2. KATA PENGALO – NGALO RAS MOMO

Turang ras senina i bas Tuhanta Jesus Kristus, selaku serayan Tuhan, ikataken kami  
mejuah-juah ras selamat wari Minggu man banta kerina.

**I BAS MINGGU ENDA LIT PIGA-PIGA PENEKANEN MOMO:**

- 1.....
  - 2.....,
- dst

**ENDA ME PENEKANEN MOMO MAN BANTA. BUJUR.**

**MARI BENGKET KITA KU KEBAKTIN**

Man bandu ngawan ni perpulungen si erkebaktin i rumah nari secara *Livestreaming*,  
tetaplah sisikapkan dirinta ras pusuhtha beribadah man Dibata,  
bagi kita beribadah i gereja. Bujur

### 3. KATA PENARUH

Turang ras Senina, Dibata nepa doni enda ras kerina isina alu dem kiniulin. Kemulian Tuhan ersinalsal i babo kerina tinepa-Na. I pehaga-Na kita alu nepa kita tudu ras tempas-Na, jenari i dilo-Na kita jadi teman-Na mpekena-kena doni enda, njaga kiniulin ras kemulian-Na subuk i bas dirinta bagepe i bas kerina tinepa. Arah kebaktin enda, ate Dibata empersingeti kita ulihi kerna kiniulin Dibata si enggo ituduhkan-Na i bas kerina tinepa-Na.

Mari dage kita mpesikap ukurta ngadap man Dibata.

----- ERKATA LONCENG -----

----- ALU MEHAMAT PERPULUNGEN I DILO TEDIS -----

Mari sipuji Tuhan arah :

**KEE No.306 : 1,4**

**“O KAM TINEPA DIBATA”**

1. O Kam tinepa Dibata si mada kuasa pujilah, Halleluya, Halleluya  
Matawari ersinalsal, k'rina teridah merandal  
Rasa lalap puji Tuhan, Halleluya, Halleluya, Halleluya

----- Musik Saja -----

----- Serayan Bengket Ku Ruang Kebaktin -----

4. Mari sipuji Tuhanta, mbelin kepe kuasa-Na  
Halleluya, Halleluya, mulia kapen gelar-Na  
T'ridah arah tinepa-Na, rasa lalap puji Tuhan, Halleluya, Halleluya, Halleluya

### 4. VOTUM – SALAM

**L** : Kebaktin enda lit i bas gelar Dibata Bapa sinepa doni enda, i bas gelar Jesus Kristus simpelimbarui tinepa-Na ras i bas gelar Kesah si Badia si mpegegehi manusia guna njagai isi doni.

Perkuah ate ras dame i bas Dibata Bapa ras i bas Tuhan Jesus Kristus nari, i bas kerembaken Kesah si Badia, ras kita kerina gelah. Amin.

**P** : *Amin.....Amin.....Amin..... (Iendeken)*

### 5. BERITA KERNAL PERBAHANEN RAS SURA – SURA DIBATA (INVOCATIO)

**L** : “Kenca bage itatap Dibata janah idah-Na maka kerina si enggo ijadien-Na tuhu – tuhu mehuli “ ( Kejadian 1 : 31a).

Erpalasken Kata Dibata enda, si puji IA alu radu ras kita ngendeken :

**KEE No.260 : 1,5**

**“OH ANDIKO JILENA “**

1. Oh andiko jilena tinepa Dibata,  
Subuk pertibi enda ras isina k'rina  
Deleng si meratah kerangen, perik-perik rende kabangen  
Andiko jilena si ban-Na, seh kel kap ulina  
**Reff.** *Emaka tangarlah min kita jelma  
Ola melasang ola meturdaksa  
Lit tenah kata pedah ni Dibata,  
Jaga kelengi, k'rina tipe-Na*

5. Oh andiko riahna, doni si 'nggo mbaru  
Aloken Tuhan Yesus, Juruselamatta  
'Lah rubia njingkang la m'lance, perturah senuan la lengke,  
Andiko riahna ras Tuhan, pusuh pe la nggine  
*Reff:.....*

----- **PERPULUNGEN KUNDUL** -----

**6. PUJIN MAN KEMULIAN DIBATA**

**L :** Marilah si puji Tuhan i bas kiniulin-Na man banta, nintalah i bas ukurta sekalak-sekalak : i puji kami Kam Tuhan, Kam enggo nepa doni enda seh kal ulina. I bereken-Ndu taneh si mehuli ingan kami erdahin, dingan ingan kami ndatken pasu-pasu-Ndu. Ilitken-Ndu kerangen meratah ras lau si meciho gelah kami mejuah-juah. I bahan-Ndu deleng-deleng si meganjang, si ngingetken kami kerna kuasa ras kemulian-Ndu. Terpujilah Kam Tuhan, arah kerina tinepa-Ndu.

**L :** Si puji Tuhan alu ras kite rende arah

**KEE No.2 : 1,2**  
**“ IPUJI KAMI KAM “**

1. Ipuji kami Kam, gelar-Ndu si mejin, Tuhan sinidas, si mekelek mbelin  
Sinasa lit kepe i surga ras i doni, man Dibatanta e ras kita k'rina muji  
Kam Si Badia e Kam tetap si 'ngkawali,  
Lias-Ndu tangkas min i surga ras i doni
2. Kam lalap man pujin ibas ende-enden, 'rkiteken bujur kap mehuli peraten  
Di reh nge pagi Kam ngukumsa pengarahen,  
Mekuah ate-Ndu min mb'ra ola kesalahen  
La kalak kemalun si ba-Ndulah ernalem  
Kam penundalenku e maka ateku malem

**7. KINATA KEGELUHEN MANUSIA I BAS NIMAI KEREHEN DIBATA**

**L :** Dibata mereken tanggungjawab guna ngusahai doni, gelah manusia nggeluh alu mehuli radu ras tinepa si deban. Arah kiniulin eme teridah kemulian Dibata. Kai ndia si enggo sibahan i bas tanggungjawab si enggo ibereken Dibata man banta?

**..... Paksa Teneng .....**

**L :** I bas paksa enda marilah kita mungkuk i adep-adepen Dibata, ngakuken kerina kelepakenta ras kinilangasupenta guna njagai ras mpekena-kena doni enda.

**P :** O Tuhan, ngaku kami kerna dosa ras kelepaken kami. Enggo reh cedana doni enda, erkiteken kelepaken kami. Megati kami la ngasup melasken ras ndalanken sura-sura-Ndu, seh maka reh cedana doni enda i lebe-lebe mata kami. Alemlah kami o Tuhan.

**L :** Sisehken pingko-pingkonta man Dibata alu ngendeken :

**KEE No.436 : 1,3**  
**“KUAKUKEN KERINA SALAHKU“**

1. Kuakuken kerina salahku, iadepen Dibatanku  
Tuhu ku gejab mbue dosangku, meluat nari kal pergeluhku

*Reff : Mekuah min ate-Ndu aku, sasapkenlah dosangku  
O Tuhan tegulah min aku, 'lah tetap jinganku*

3. Dosa nggo dem ibas pusuhku, si 'rbanca ndele ateku  
Nggo bene pengarapen geluhku, ceda tuhu pusuh ras ukurku  
*Reff :.....*

**----- PERPULUNGEN TEDIS -----**

**8. PADAN DIBATA MAN SINGAKUKEN KINILATUNGGENNA**

**L :** Selaku persuruhen Dibata, aku nehken kata-Na man banta kerina, kita si ngakuken dosanta : *“Aku me Dibata si nepa doni enda alu kemulian-Ku. Aku setia man bandu, perkeleng ate-Ku tetap rasa lalap. Amin gia kam rusur ndabuh i bas dosa, keleng ate-Ku la urak man bandu. Kualemi dosandu, janah Kubereken kengasupen man bandu guna njagai doni enda. Ernalemlah man bang-Ku, sabab Aku me ulu gegehndu.”*

I bas kita enggo ngaloken padan Dibata, mari kita muji IA arah :

**KEE No.391 : 1,2**

**“ANEM DOSANGKU MEKELAT MEGARA”**

1. Anem dosangku mekelat megara, isalihken-Ndu me jadi mbentar  
Kam kap erbanca geluh meherga, kugejab tuhu keleng-Ndu simpar  
*Reff : Tendingku ersurak janah nembah, ku pakeken me pedah  
Kam kap Dibata Bapa si perkuah, bas kepkepen-Ndu min aku gelah*
2. Ukur pinter ras bujur nge pindo-Ndu, pusuh sigetem ngena ate-Ndu  
Demi pusuhku alu lias-Ndu, gelah kupembarken min kata-Ndu  
*Reff :.....*

**----- PERPULUNGEN KUNDUL -----**

**9. KATA DIBATA**

**a.** Ngoge Kata Dibata Bagin Si Pemena : **1 Korinti 12 : 1 – 11 ( Tunggal )**

**L :** Ketuahen kalak si megiken Kata Dibata, dingin si makekenca i bas geluhna si teptep wari. Haleluya.

**P :** Haleluya..... Haleluya..... Haleluya..... (*Iendeken*)

**b. (Ibenaken ras i dungi alu pertoton)**

Khotbah: **Masmur 36 : 6 – 11 ( Responsoria)**

**“Kiniulin Dibata Tangkas I Bas Tinipa-Na “**

**----- PERPULUNGEN TEDIS -----**

**10. PENGAKUN KINITEKEN**

**L :** *Marilah si akuken kinitekenta raduken kerina kalak Kristen i bas ingan ras paksa i doni enda, ninta dage ras-ras:*

**L&P :** Aku tek man Dibata Bapa si la ersibar kuasa-Na, sinepa langit ras doni.

Aku tek man Yesus Kristus, Anak-Na si tonggal Tuhannta, si jadi arah Kesah Si Badia, tubuh idur singuda-nguda nari si so keliamen tergelar si Maria, si ngenanami kiniseran sangana pemerintahen Pontius Pilatus, nipakuken ku kayu persilang, mate, jenari ikuburken, nusur ku doni kematen, peteluwariken enggo keke ibas si mate

nari, nangkih ku surga, perkundul-Na arah kemuhun Dibata Bapa si la ersibar Kuasa-Na, jenari reh me IA pagi, ngeranaken si nggeluh ras si enggo mate. Aku tek man Kesah si Badia, janah lit sada gereja si badia, persadan kalak si badia, pengalemi dosa, kinikeken kula, kegeluhun si rasa lalap. Amin

----- PERPULUNGEN KUNDUL -----

## 11. PERSEMBAHEN

**L** : Genduari seh me paksana kita ngendesken persembahen pengataken bujurta man Dibata. Kata Dibata si jadi palas i bas kita nehken persembahenta man Dibata i buat i bas **Epesus 1 : 11-12** : *“Kerina ibahan Dibata sue ras si ngena ate-Na dingan rikutken si enggo itetapken-Na. Tangtangna nari kita enggo ipilih Dibata, sabap IA ersura-sura gelah kita dat bagin i bas kai si enggo jadi sikerajangen Kristus. Janah, gelah kita kalak si pemena erpengarapen man Kristus, nggeluh tama pujin man kemulian Dibata.”*

Iherta ngendesken persembahen rende kita i bas :

**KEE No.405 : 1,2**

**“MARI SI PUJI TUHANTA SI BADIA“**

1. Mari si puji Tuhanta si Badia, simereken keleng-Na man Banta  
Kataken bujur min perban mbelin kuasa-Na  
Pasu – pasu-Na kap tep –tep wari man banta
2. Mari si puji Tuhanta si Badia, si persembahkan persembahenta  
Kataken bujur min perban mbelin pe'mre-Na  
Si njaga kita suari berngi lalap min

----- **PERTOTON PERSEMBAHEN RAS SYAFAAT** -----

----- PERPULUNGEN TEDIS -----

## 12. PERPADANEN MAN DIBATA

**L** : Dibata nepa kam alu tempas-Na, gelah kam ngasup jadi teman-Na guna njagai ras mpekena-kena doni enda.

**P** : Bujur Tuhan i bas kengasupen si ibereken-Ndu man kami, erpadan kami guna njagai ras mpekena-kena doni enda.

**L** : Kerina ibereken Dibata man bandu gelah kegeluhennu pe jadi mehuli.

**P** : Ateku tetap njaga kiniulin Tuhan, si enggo isuanken-Na i bas diringku.

**L** : Guna peteguhi perpadanenta man Dibata, si puji Tuhan alu rende i bas :

**KEE 281 : 1,3**

**KEK'LENGEN YESUS KEMPAK MANUSIA “**

1. Kek'lengen Yesus kempak manusia, desken Dibata engkelengi ia  
Kekelengen-Na maler kap man banta, adi sipakelah pedah-Na

*Reff : Min sikeleng-kelengen kita k'rina, bagi pedahkan Yesus bas pustaka  
Sababna kai si pindo bas gelar-Na, ib're Dibata man banta*

3. Bas paksa kita nehken kekelengen, ola min sibana ceda kempak teman  
Erban mehuli ola rahan-raham, lah kedamen jujurken Tuhan

*Reff :.....*

### **13. PERTOTON TUHAN**

*L : Mari ertoto kita bagi siniajari Tuhan Jesus, ninta dage ras - ras:*

**L&P:** O Bapa kami si ni Surga, gelar-Ndu ipebadia min; reh min Kinirajan-Ndu; sehlah min peraten-Ndu, i bas doni enda bagi ni Surga. Bereken min man kami nakan cukup i bas wari si sendah enda. Alemin salah kami bagi nialemi kami salah kalak kempak kami. Ola min kami ibaba Kam kubas percuban, tapi olangilah kami idur si ilat nari. Sabab Kam kap si mada Kinirajan, ras kuasa, ras kemulian si ndekah-ndekahna. Amin

### **14. PENGUTUSEN RAS PASU – PASU DIBATA**

**L :** Bengketlah kam ku bas kegeluhendu si teptep wari, pekena-kenal doni enda, Ingetlah, maka Dibata tetap kap ras kam seh ku kedungen doni enda, dingan alokenlah pasu-pasu idur Dibata nari :

*“I pasu\pasu janah ikawali Dibata kam, siang ayo Dibata ersinalsal ibabondou, janah melias ate-Na ngenehen kam. Itatap Dibata ku kam, janah malem atendu ibahan-Na. Amin.*

**P :** Amin....Amin.....Amin.... (*Iendeken*)

### **15. PAKSA TENENG (*ibabai serayan si naruh*)**

*(Kenca dung paksa teneng, nina serayan si naruh)*

**SELAMAT WARI MINGGU MAN BANTA KERINA  
MEJUAH-JUAH, SALAM SEHAT, SALAM TANGGUH TETAP  
SIDALANKEN PROTOKOL KESEHATEN**

**KHUSUS MAN BANTA SI KEBAKTIN ONSITE I GEREJA,  
IPERSINGETI MULIHI MAN BANTA, SELAMA  
BERADA I LINGKUNGEN GEREJA,  
TERMASUK PE ADI FOTO-FOTO TETAP PAKE MASKER.  
BUJUR**

**DIBATA SI MASU-MASU**